

*Maana kama vile mvua ishukavyo, na theluji, kutoka mbinguni, wala bairudi buko; bali huinywesha ardhi, na kuizalisha na kuichipuzi, ikampa mtu apandaye mbegu, na mtu alaye chakula—Isaya 55:10.*

**Y**esu anatafuta kujenga tabia Yake katika mioyo ya wanadamu; na Anafanya hivi kupitia kwa wale wanaomwamini. Kusudi la maisha ya Kikristo ni kuzaa matunda—nakala halisi ya tabia ya Kristo kwa muumini, ili iweze kuzalishwa tena kwa wengine.

Mmea hauoti, au kukua wala kuzaa matunda kwa ajili yake wenyewe bali “ikampa mtu apandaye mbegu, na mtu alaye chakula.” Kwa hiyo hakuna mtu apaswaye kuishi kwa ajili yake mwenyewe. Mkristo anaishi duniani kama wakili wa Kristo, kwa ajili ya wokovu wa roho zingine.

Hapatakuwa na kukua sana au kutoa matunda katika maisha ambayo yanatawaliwa na ubinafsi. Ikiwa umempokea Kristo kama Mwokozi wako binafsi, yakupasa kujisahau na kujaribu kuwasaidia wengine. Nena nao juu ya upendo wa Kristo. Waeleze juu ya wema Wake. Fanya kila jambo linalojionesha wazi. Beba mzigo wa roho katika moyo wako na kwa njia zote zile zilizo katika uwezo wako jitahidi kuokoa walipotea. Unampopokea Roho wa Kristo—Roho ya upendo usio na ubinafsi na kuwahudumia wengine—itakua na kuzaa matunda. Neema ya Roho itakomaa katika tabia yako. Imani yako itaongezeka, na matarajio yako yatakuwa na kina, pia upendo wako utakamilishwa. Utaakisi sura ya Yesu zaidi na zaidi katika yote yaliyo safi, yenye sifa njema na ya kupendeza.

“Tunda la Roho ni upendo, furaha, amani, uvumilivu, utu wema, fadhili, uaminifu, upole, kiasi” (Wagalatia 5:22, 23). Tunda hili haliwezi kuharibika, bali litazalisha kwa aina zake mavuno ya uzima wa milele.

“Hata matunda yakiiva, mara atapeleka mundu, kwa kuwa mavuno yamefika.” Kristo anasubiri kwa shauku kuu kuweza kudhihirishwa katika kanisa Lake. Hapo tabia ya Kristo itakapooneshwa wazi kupitia kwa watu Wake, ndipo atakuja kuwachukua watu Wake.

Ni wajibu wa kila Mkristo si kutazamia tu ujio wa Bwana Yesu Kristo bali kuuhimiza. Kama ingekuwa wote wanaolichukua jina Lake wanazaa matunda kwa ajili ya utukufu Wake, ulimwengu mzima ungepandwa mbegu ya injili kwa haraka jinsi gani! Upesi mavuno makuu ya mwisho yangepevuka na Kristo angekuja kukusanya ngano yenye thamani.

Kama mmea unavyoweka mizizi ardhini nasi yatupasa kuweka mizizi ndani zaidi kwa Kristo. Kama mmea unavyopokea mwanga wa jua, umande na mvua, yatupasa tufungue mioyo yetu kwa ajili ya Roho Matakatifu. Ni lazima kazi ifanyike, “Si kwa uwezo, wala si kwa nguvu bali ni kwa Roho yangu, asema Bwana wa Majeshi” (Zekaria 4:6) (Lulu za Uzima, uk. 37 – 39).